

SIGEBERTI HAVERCAMPENSIS
ORATIO
INAUGURALIS;

qua probatur;

VIGENTE ÆMULATIONE, ET GLORIÆ STUDIO,
VIRTUTEM GRÆCORUM AD MAXIMA
IMPERII ET LITERARUM INCREMENTA
PERVENISSE; AT VERO, SUBLATA
ÆMULATIONE, ET EXTINGUO
GLORIÆ ARDORE, OMNE
DECUS LITERARUM, UNA CUM
IMPERIO, CONCIDISSE.


Publice habita a. d. 2. Decemb. MDCCXXI.

Quum ORDINARIAM GRÆCÆ LINGUÆ
PROFESSIONEM in Illustri ACADEMIA
LUGDUNO-BATAVA solemniter
auspicaretur.



LUGDUNI BATAVORUM,
Apud ISAACUM SEVERINUM. MDCCXXI.

4454



ILLUSTRISSIMIS ET NOBILISSIMIS

VIRIS,

ACADEMIAE LUGDUNO-
BATAVAE

CURATORIBUS,

D. D. WILHELMO, BARONI
WASSENARIAE,

Dynastae in Sterrenberg, &c. Equestri
Ordini Nobilium Hollandiae Praefidi,
Magni Sigilli Custodi, &c. &c. &c.

D. D. HUBERTO ROSENBOOM, JC.
Toparchae in 's Grevelsregt, Supremae
Batavorum Curiae Praefidi, &c. &c. &c.

D. D. HERMANNO VANDEN HONERT,
JC. Reipublicae Dordracenae Consu-
lari, Aggerum Alblafferwaerdenfium
Comiti, &c. &c. &c.

eorumque collegis,
viris amplissimis,
REIPUBLICÆ LUGDUNO-
BATAVÆ
CONSULIBUS,
D. D. CAROLO CRUCIO, JC.
Consulū Praefidi, &c. &c.
D. D. NICOLAO VAN BANCHEM, JC.
&c. &c.
D. D. HENRICO VAN WILLEGEN, JC.
&c. &c.
D. D. PETRO CUNEO, JC.
&c. &c.

UT ET
VIRO GRAVISSIMO,
D. D. PETRO GYS, JC.
Civitatis Lugdunensis Scabino, & Il-
lustri Curatorum & Consulū Confes-
sui à Secretis,

Hanc Orationem

D. D. D.
SIGEBERTUS HAVERCAMP

ORATIO INAUGURALIS.



*A*ttentis *Africae* rebus, & de-
bellatis *Pœnis*; quum in Se-
natu *Romano* longe maxima
res ageretur, quid de sub-
acta *Carthagine* esset statu-
endum? inexpiabili odio flagrans *Cato*, se-
vere pro more & censorie pronunciavit,
Delendam esse Carthaginem. At ille ex no-
bilissima *Corneliorum* Gente, illustri *Sci-
pionum* Familia, *Idææ Matris* hospitio
Optimus Civium judicatus *Nasica*, provi-
de censuit servandam, NE METU ABLA-
TO ÆMULÆ URBIS LUXURIARI FELICI-
TAS ROMANA INCIPERET.

Verissimam hanc Sententiam, & tanquam
ex tripode prolatam, non modo eventus

A in

in ipsis *Romanis* postea docuit, sed & per omnes populos densa ubique probarunt specimina. UBI ENIM VIRTUTEM PRÆCIPUE GRÆCORUM CONSIDERO, TAM ILLAM BELLICAM, QUAM LITERARIAM; FERVENTE INVICEM ÆMULATIONE ET GLORIÆ STUDIO, AD MAXIMA RERUM INCREMENTA PERVENISSE INVENIO; AT VERO SUBLATA ÆMULATIONE, ET EXSTINCTO GLORIÆ ARDORE, OMNE DECUS LITERARUM UNA CUM IMPERIO CONCIDISSE.

Quod ipsum, AUDITORES HUMANISSIMI, dum Vobis, tanquam depictum in Tabula, ante oculos ponere satago, advortite quæso animum, & benignas Orationi meæ præbete aures.

Exempla in medium proferenda sunt? & libera in *Themistocle* vidit *Græcia*, & ferva eadem admirata est in *Philippo*, in *Alexandro* autem domitus universus Terrarum obstupuit Orbis. At quibus illi
sti-

stimulis excitati somnum oculis non videre suis? quibus incensi ignibus, ad *Græciæ* Dominationem adspirarunt? quibus percussi successibus, ne excitanda ex hoste aliquo tropæa sibi relinquerentur, sunt veriti? Nullis; nisi Æmulatione laudis, & licita quandoque Gloriæ ambitione. *Marathonia* ante oculos Tropæa, Virtus unius *Thebani*, *Philippi* victoriæ, quos ferierunt, & *Miltiade* clariores, & *Epaminonda* majores, & ipso *Philippo* victoriosiores reddere potuerunt.

Imperium *Græciæ*, sicut varie fluctuavit ad *Philippi* & *Alexandri* usque tempora, gesto bello pari milite, paribus armis, exercitatione corporis atque animi virtutibus iisdem, ita, quæ inter pares feravidissima solet esse æmulatio, nunc victricem salutavit filiam *Jovis Ægiuchi* armipotentem *Minervam*, nunc armatam *Venerem*, vel sine *Paride* victoria potiri vidit. Degustarunt & expetitum multis

Dominationis titulum *Bæöterum* sub crasso aëre nati; ubi unius hominis virtus totius Gentis absolvit decus, & in *Epaminonda* inchoatum eorundem atque extinctum est Imperium.

De *Atheniensibus* prius ut agamus, & ordo rei & ratio Gentis exigit, quæ, si vel nulla, seu vicini, seu peregrini populi æmulatio exstitisset, tamen ipsa ex sese omnigenæ virtutis exempla posteritati prodidisset. Quidni enim ex sese generaret typum rerum expetendarum, cujus & ultra modum foecunda tellus *Autochtonas* peperisse fertur incolas; cui Dea contigit cæsis oculis *Minerva*, non illa pro more communi, sed ex *Jovis* cerebro nata virago. Itaque mihi illorum virtus & cum populo suo nata esse videtur, & gloria proxime ad Immortales Deos accessisse.

Paria virtutum exempla in *Atheniensibus* si quæramus, & *Codrüs* sese & *Salon* offerunt; incertum, utrum ille præstantior ge-

gesto Regno, an hic contempto. Utrique certe plurimum *Atheniensium*. debuit Respublica; Illi, quod liberi a servitute hostium viverent, & *Dorienſium* victores; Huic, quod *Megarenſium* contuderint factum; &, quod longe majus est, omnes justitia & pietate vicerint mortales. Morte voluntaria salutem Patriæ *Codrus* redemit, & Oraculi implevit fidem. Capitis sui periculo Civium indecoro Plebiscito adversatus est *Solon*, atque ipsis *Apolline* verius exstitit Oraculum. Si itaque memoriæ *Codri* est datum, ut nemo post eum *Athenis* regnaverit, sed ipse ultimus exstiterit Regum; non tam *Athenienses Soloni*, quam ipsa veritas testimonium Viro præbuit, & primum Sapientum *Solonem* dixit.

At quoniam sibi commode, quæ sapientiæ non tantum erat Dea, sed & belli, *Minervam* elegere *Athenienses*, vix majora virtutum & æmulationis exempla, quam

B

in

in clarissimis illis duobus Belli fulminibus, *Miltiade*, atque *Themistocle*, inveniuntur. Quid enim nobilius pugna illa *Marathonia*, & Tropæis illis, quorum cogitatio dulcem præ cunctis, fesso homini, somnum adimebat *Themistocli*? Hic quam bene magnificis tanti Imperatoris laudibus & rebus gestis succedit! Uterque Maximum Regem, totius *Asiæ* instructum viribus, & numerosissimos exercitus, devicit, delevit. Uterque, & in providendo cautus, & in exsequendo promptus, victoriam non numero militum, sed virtute, parari ostendit. Pares & in illo, quod invidia, quam raro bonus quisquam effugit, oppressi, ille quidem carcerem & mortem magno tulerit animo, hic vero exfilium & damnationem.

In arenam nunc prodeat par bene comparatum, eloquii suada invictus *Pericles*, & sublimitate cothurni Princeps *Sophocles*.
illis scilicet temporibus vere magnifici
in-

incedebant *Athenienses*, quibus *Martis* & *Musarum* uni atque iidem erant alumni, quum & *Socrates* fortiter faceret, & in Scenam eundem afferret animum, quem ex praelio retulerat, *Æschylus*. *Sophoclis* certe sublimis ardor etiamnum gravi effulget carmine; *Periclis* autem in æternum laudabitur prudentia; qui, prævidens ex intactis ab hoste agris invidiam sibi & proditiōis infamiam quæri, jam antè fundos suos Republicæ dono dederat; clarus aucta virtute & fortitudine sua Republica; major etiam aliquanto privati contentu patrimonii.

Disputatum fuit a multis, utrum natura, an ars, plus valeat in homine. Et inter has ipsas quasi arcana quædam videtur esse æmulatio. Apertam vero atque publicam, *Athenienses* pariter, *Alcibiades* atque *Conon* præbuere. In illo Natura, quid efficere posset, experta creditur. In hoc longa experientia. Itaque uterque summus A-

theniensium Dux est habitus, uterque summas Patriæ peperit victorias. Utroque absente, Civibus suis omnis Victoriæ fructus, imo ipsa libertas, periit. Et denique, quasi in utriusque fato æmulatio quædam fuisset Sortis, exilium ante pariter experti, dum amplificare Patriam ex hoste student, pari proditione opprimuntur.

Sine Fortuna si Virtus per se sit æstimanda; negant, fide, constantia, magnitudine animi, in Patriam amore, *Thrasibulo* quemquam esse præferendum. Hujus & ante virtus Bello innotuerat *Peloponnesio*, & longe clarior exstitit fama, pulsis triginta Tyrannis, & reddita Patriæ libertate. Habemus tamen æmulum studiorum ejus atque virtutum *Lysiam* illum Oratorem, a parentibus quidem *Syracusanum*, sed quem in tantum juvit *Athenis* esse natum, ut & ipse, eodem tempore exsul, quingentos milites, stipendio suo
in-

instructos , in auxilium Patriæ communis Eloquentiæ miserit.

Properamus ad terminum Gloriæ *Atheniensium* , & finitam Dominatione *Philippi* Rempublicam. Verum , sicut morientium , non fortia modo verba , sed & facta quandoque esse solent ; ita omnium illorum , quos memoravimus , virorum , virtutumque eorundem , ab Antiquis Scriptoribus æmulus *Iphicrates* proponitur ; cujus , adolescentis adhuc , supra ætatem virtus admirabilis fuisse dicitur , ita ut nunquam ante eum *Athenienses* , inter tot tantosque Duces , aut spei majoris , aut indolis maturioris , Imperatorem habuerint , utpote in quo non Imperatoriæ tantum , verum & Oratoriæ artes eluxerint. Cum hoc eodem , qui ad senectutem vixisse traditur , consenuit virtus *Atheniensium* ; illorum *Atheniensium* , quibus ingens existimationis testimonium ejusdem *Iphicratis* , ex *Thresfa* Regis *Coti* Filia genitus , Filius *Mnestheus*

dedit, qui interrogatus: Utrum pluris Patrem, Matremne faceret? Matrem, respondisse fertur. Quod quum omnibus mirum videretur; subjecisse: At merito! Nam Patrem, quantum in se fuit, *Thracem* sese genuisse: contra Matrem *Atheniensem*.

Nimii si forte in *Palladis* Urbis alumnorum laudibus cuiquam fuisse videbimur; *Laconice* porro iis defungemur, quorum breuiloquentia etiam in Proverbium abiit. Si tamen paucis dicenda virtus illorum, qui facere, quam dicere amaverunt; & aliis permittere scribendarum Historiarum laudem, modo ipsi exempla scribentibus ministrarent.

At quis mihi primus ex illa Gente & Civitate dicendus, cujus universus Populus nihil aliud nisi quotidiana virtutis invicem fuit æmulatio? Ubi relicto colo, & spretis luxu omni atque deliciis, nihil muliebriter pro consueta impotentia delicatus

catus fecit sexus, verum, æmulæ laudis Ephëborum virgines Gymnasia *Spartanorum* toto Orbe fecêre celebria. Laudi certe *Lacænis* cessit, majore mulierum quam virorum virtute repulsus hostis. At quis ille? cui nullum Regum, aut Imperatorum, vel ejus, vel superioris ætatis, comparandum fuisse perhibent, *Pyrrhum Epirotam*.

Quales in illa Civitate, quum maxime *Lycurgi* floruêre instituta, & auri incognitus pallor, Viros fuisse dicemus? *Codro* suo Nobiles incedant *Cecropidæ*, quem illi opponant *Spartani* habent *Leonidam*, tanto speciosiore æmulum, quod non pro victoria, de Gente, *Græca* Lingua & institutis utente, fortem impenderit animam; sed, pro Patria sua, imo universa *Græcia*, ne *Barbaris* serviret, se atque trecentos suos, *Spartana* objecerit moenia.

Magnum sane virum *Alcibiadem*, illum *Cliniæ* & *Dinomaches* Filium, *Socratis*

Discipulum, omnium *Atheniensium* nobilissimum, fuisse, in comperto est. Huic æmulum in omni fere vitæ genere *Pausaniam* produxit *Lacedæmon*. Testis *Mardonius*, & lecta viritim, ducenta peditum, equitum viginti millia; qui *Platæas* clade sua & victoria *Pausaniæ* nobiles fecerunt.

Agésilæum certe, quo Statore Reipublicæ, nequaquam *Lacedæmoniorum* claudicavit Imperium, ipsa etiam Fortuna parem *Cononi* æmulum suscitavit. In quibus tantis Ducibus; ætate, virtute, consilio, sapientia paribus; gloria rerum gestarum utrique sua mansit, & quum sub nullo majori hoste fata remanerent, tamen ab altero invictus uterque discessit.

Diximus & *Thebanos* Imperium *Græciæ* degustasse. Hoc illis virtus unius dedit hominis; sed talis, in quo literarum simul & militaris scientiæ fuit æmulatio,
ut

ut & disceptatum de illo fit, utrum Dux, an vir melior, fuerit. Neque cum illo tantum intercidit *Thebanorum* gloria, nullis postea virtutibus, sed cladibus insignium; verum virtus quoque *Atheniensium* hebetata fuit. Sublata enim æmulatione, quam ille acerrime inter omnes accenderat, ex labore & ipsi in quietem, & ex quiete in luxuriam prolapsi sunt, quæ denique illis & finem gloriæ & jugum servitutis superinduxit.

Postquam enim *Philippus*, *Macedonici* ille ampliatus Regni, post præludia constituendæ dominationis, in *Illyrios*, *Cap-padoces*, *Thessalos* & *Phocenses* exercita, velut robur & cor *Græciæ*, *Athenienses* est adortus, nequaquam, *Thebanis* licet opitulantibus, violentiæ ejus resistere potuerunt, corpora quidem pugnæ objicientes, sed non animum illum, quibus fractæ *Persarum* recessere vires, & plus semel magnis successibus universæ *Græciæ* ten-

D

tata

tata fuit dominatio.

Alexandro, *Philippi* Filio, cui, a rerum gestarum magnitudine, *Magni* cognomen adhæsit, Imperio par animus fuit. Incensus enim, non Patris tantum, sed & *Æacidae*, & ipsius *Herculis*, generis sui auctorum, æmulatione, omnes omnium conatus superavit, & in gloriæ studio longissime post se reliquit. Tantam itaque futuræ magnitudinis spem animo concipere potuit, ut trajecturus in *Asiam*, & stans in procinctu, diviso inter amicos, quod sibi in *Macedonia* atque *Europa* erat, patrimonio, *sibi Asiam sufficere* præfatus fuerit, & conspecta primum hostili terra, incredibili ardore animi, Duodecim Deorum aras in belli vota statuerit.

Tantis itaque rebus gestis, urgente fato, merito videtur mihi circumstantes amicos percunctatus fuisse, *Viderenturne similem sibi reperturi Regem?* Æmulationis certe bellicum inter eosdem cecinit

VOX

vox ejus ultima , qua heredem Imperii fecit *dignissimum*. Omnes enim summis abhinc annis sunt viribus , ut nemo sese præstantior , aut Imperio videretur dignior.

Facile autem singulis fuit æmulos virtutis & gloriæ , imo & Regni sui , invenire , nam sicuti , nisi ipsi inter sese concurrissent , & æmulatione mutua maxima concitassent bella , pares nusquam reperissent ; ita foecundam maxime Historicis , rerum mira vicissitudine fortis gestarum , reliquere materiam. Ipsos enim illos inter se si conferre velimus , quis *Perdicca* fuit magnificentior , *Eumene* fortior , *Antigono* mansuetior , *Lysimacho* bellicosior , *Seleuco* & *Ptolemæo* prudentior & fortunatior ? qui sublati omnibus æmulis , maxima *Syriæ* atque *Ægypti* tenentes Regna , ad feram posteritatem Regium Nomen propagarunt.

Regrediamur in *Europam* , sed tamen ita ,

ut inter Græcos, & in familia *Alexandri* decus illud æmulationis observemus. Matri ejus *Olympiadi*, magni animi, & supra sexum forti mulieri, frater erat ejusdem cum filio nominis, *Epirotarum* Rex, *Alexander*. Excitatus hic virtute affinis sui, quasi debitum duobus *Alexandris*, alteri Orientis, Occidentis alteri, esset Imperium, maxima animi alacritate, *Italiae*, *Africae*, & *Siciliae*, *Græca* illaturus arma, in gravissimam æmulationis palæstram descendit.

At hunc non vi hostium, sed fraude exfulum interemtum, egregie excepit *Pyrrhus*, Rex pariter *Epiri*, & *Æacidarum* progenies. Hujus quot prælia, totidem fuere victoriæ; quot bella, totidem Regnorum occupationes. Testis *Italia*, testis *Sicilia*, *Africa*, & ipsa denique *Græcia*. Nemo *Pyrrhum*, quo impetus tulit, ferre potuit. Hic *Græcorum* vetustissimos imitatus, non illos modo, quos
re-

recensuimus, sed & *Phociones* & *Aristidas*; rarissimam sui, in Rege, & tanto, famam ad posteros transmisit; ut vitæ ejus sanctitas, & incorrupta justitia, inter exempla, non tantum Regum, sed & Illustrum Virorum numerari mereatur.

Prolatis in medium hisce tam magnificis virtutis & æmulationis exemplis, injuriam Regiis facere Titulis viderer, si minorum gentium quædam adderem exempla, quamvis & *Ætolorum* virtus longo steterit tempore, illibata adversus *Atheniensium* & *Spartanorum* dominationem; clara etiam; quod iidem a *Persarum* Tyrannide domesticis sese opibus vindicaverint, *Gallorum* vero violentiam, *Asiæ Italiæ*que terribilem, *Delphico* bello fregerint.

Clarum quoque nomen *Achæorum*, longa libertate, & imprimis Duce *Philopæmene*, fuit, qui sicut maximis sui temporis Ducibus *Annibali* & *Scipioni*, nominis gloria jungitur, ita pariter violento raptus fato, infi-

E

gnem

gnem trium toto Orbe maximorum Imperatorum morte annum effecit. Sed & in hoc mihi, ipsius Ducis, ejusque Patriæ, cum *Epaminonda* atque *Thebanis*, æmula Sortis videtur fuisse conspiratio. Sicut enim assiduis cladibus *Thebani* Ducis memoriæ fuit parentatum; ita & *Achæi*, sublato quem æmulerentur cives, prolapsi in deficiam, non longe post in *Romanorum* venere potestatem; atque ipsa opulentissima Urbe *Corintho*, capite Regni, diruta, *Bæotorum* infelicitati & *Thebarum* everfioni adæquati sunt.

Neque enim aliter fieri potuit, quin, cessantibus exemplis, pariter & æmulatio & ipsa virtus concideret. Magnum illud, & in ipsa ruina metuendum *Macedonici* Imperii Regnum, ubi exempla virtutis atque æmulationis defecere, repente, velut fulmine ictum, dissipatum atque deletum, interiit. Ubi virtus *Demetrii*, alterius ex *Philippi* filiis, qui *Romæ* obses fuerat, fratrem

trem *Perseum*, non ad æmulationem, sed ad invidiam pertraxit, ejusque gratia obrectationem, imo & parricidium peperit; non erant jam illi *Macedones*, qui *Orientis* dissolverant Imperium, & *Græciam* subjugaverant; non ille Rex, qui obscuram Gentem, virtute sua & fortitudine, ad summa fastigii humani incrementa proveheret. Multo itaque citius, quam *Græciæ* & *Asiæ* sibi Imperium, sub pristino illo *Philippo*, atque filio ejus *Alexandro*, asseruerant, ipsam etiam libertatem cum Regio amiserunt nomine, & victo atque capto, *Philippi* ultimi, filio *Perseo*, in Provinciæ formam ab *Æmylio Paulo* redacti, leges a victore Populo accepere, qui quondam universæ *Græciæ Asiæque* legem dixerant.

Audivistis AUDITORES, quid æmulatio & gloriæ potuerit studium, quæ quamdiu viguere, non invictam modo ab hoste præstitere Græciam, sed victricem &

formidandam ubique reddiderunt. Utroque vero amisso, non finitimis tantum, sed & remotis populis, prædæ spe allectis, pro facili portione accefferunt.

Credite nunc eundem ardorem, qui in prælia armavit milites, & bellatores misit in aciem, nobiliora ingenia incredibili desiderio afflasse; ut, quasi exuta mortali conditione, per ora virum viva volitarent. Hinc, quem spirantem patria sua vix agnovit, mortuum, corpore non fama, civem suum septem nobilissimæ Urbes, Nummis, Aris, Templis vindicaverunt. De Rege Poëtarum, *Homero*, loquor, cujus, sicut Carmina legentium attonitos non tantum feriunt animos, sed & ad Divinam illam Artem, æstu quasi percitos, rapiunt, ita non potuit non æmulos laudis suæ invenire. De *Chærilo* ut nihil dicam, *Samio* illo, vel, ut alii volunt, *Hallicarnassense*, visus sibi & quibusdam aliis est *Antimachus Colophonius* ad *Homerici*
Car-

Carminis gloriam proxime adspirare. Cujus *Thebaica* ingenti conscripta fuisse spiritu perhibent; Hic ipse tanto æmulationis cæstro fuit percitus, ut, quum compositis in laudem *Lysandri* versibus, *Niceratus Heraclæotes*, judicio *Lacedemonii* istius superior exstitisset, scriptum a se Carmen aboleverit. Et tamen *Chærii*, pingue ingenium & proemio amplissimo & honore maximo remunerati sunt *Athenienses*. Conscripta enim *Atheniensium* contra *Xerxem* victoria, pro singulis versibus aureum staterem accepisse fertur; atque ut quotannis Carmina ejus una cum *Homericis* recitarentur, decreto sancitum fuit.

Vilem ob hircum (unde & Tragoediæ nomen exstitit) certavere quondam rudes in plaustris versificatores; verum, postquam bellator *Æschylus*, pro ridiculis Ludis, ad seria animum attendere edocuit, & graves in Theatro personas grandiloquentia Carminis sui fecit spectabiles; non

F ali-

aliter Tragoedias ejus, *Persas*, *Agamemnonem*, *Septemque ad Thebas Duces*, admirati sunt Cives in cothurno, quam ipsum, triplici in prælio, *Marathonio*, *Platæensi*, & navali ad *Salaminem*, heroice dimicantem; qui fratre quidem *Cynegiro*, omnium *Græcorum* fortissimo, singulari edita pugna, amisso, *Amynia* etiam, per crebra, pectore adverso excepta, vulnera, inutili Patriæ reddito, superfuisse videtur, ut, non corporis tantum viribus, sed & vi ingenii, æmulationis studium inter *Græcos* accenderet.

Expertus itaque ipse, in limine fœdatis, gravem adversarium est *Sophoclem*; illum, quem, provectiore ætate, Ducem etiam Patriæ fuisse, diximus; & a juvene vix viginti quinque annorum superatus, adeo ægre tulit, qui, nec in Theatro, nec in Prælio, vinci assueverat, ut præ indignatione animi in *Siciliam* fecedens, nec ossa sua *Atheniensibus* donari voluerit

Te-

Tenet itaque Scenam *Sophocles* semper victor , & duodeviginti , vel , ut alii volunt , viginti quatuor coronis , fremen-
tibus adversariis , inclytus ; cujus etiam
Cothurnus , ob sublimè genus dicendi , in
Proverbium abiit.

Laudum & gloriæ æmulus excipit hunc
Tragicorum sapientissimus *Euripides* , de
quo *Quintiliani* exstat judicium , quod
utroque longe utilior vi & sermone , magis
accedat Oratorio generi , & sententiis den-
sus , & rebus ipsis ; & in his , quæ a sapien-
tibus tradita sunt , pœne ipsis par , & in di-
cendo ac respondendo cuilibet eorum , qui fue-
rant in foro disertis , comparandus. In af-
fectibus vero , tum omnibus , mirus , tum in
iis , qui miseratione constant , facile præci-
pius. Et quidni magnum fuisse virum
existimemus illum , cujus unius gratia , il-
le , qui , Oraculi testimonio , sapientissi-
mus audiebat mortalium , *Socrates* , ire in
Theatrum non erubuit ?

Tragœdia, patriore titulo, Comœdia top-
ponitur; In qua, Veteri quidem, ita emi-
nuit inimitabilis *Aristophanis* depor, ut su-
pra commendationem os illud sit *Atticum*.
In nova vero, acerrime æmulos se præbue-
re *Menander* & *Philemon*, fluctuante inter
utrumque sæpius victoriæ palma, mobi-
lique populi aura, nunc in hunc, nunc in
illum prono iudicio inclinante. *Menander*
certe ita graphice mores hominum depin-
xisse traditur, ut dubium dixerint, utrum
vita *Menandrum*, an *Menander* vitam ex-
presserit.

Philetæ & *Mimnermi* si exstarent Elegi,
videremus quousque illorum processerit
æmulatio, quidve in amore præ *Homero*
valuerint; nam *Anacreontis*, *Sapphus*, *Al-
cai*, innumerorumque aliorum, doctos
labores, Patriæ communis secum rapuit
fatum, & cum irreparabili elegantiorum
hominum damno, tantum non penitus
abolevit.

Fe-

Feliciores, satis dignissima Immortalitate Scripta veterum Medicorum, vel certe ex iis præstantissima, ad nostram ætatem pervenerunt. In hisce suæ gloriæ sibi soli unica æmula existit Græcia, dum viros, multis aliis æquiparandos, ex suo protulit gremio, variæ sibi invicem laudis æmulos. Neque enim contenti hi, propulisse a mortalibus diram morborum pestem, & mille mortis modis, quantum humana fieri potuit industria, obviam ivisse; tacita quadam virtutis æmulatione, & pulcherrimæ rei gloria ducti, non tantum de artis suæ peritia, sed & de scientia Humanioris Literaturæ adhucdum invicem certare videntur. Testes mihi advoco illos quoscunque, qui vera ad scientiam via grassati, dum ex nativis hortis semina & flores doctrinæ legunt, apud *Nicandrum* quidem, ligata oratione, simplices illas & veteres *Græci* sermonis delicias, soluta autem, admirantur penes *Ætium Amidenum, Aretæum Cap-*

G

pa-

padocem & Alexandrum Trallianum. Nam ad *Hippocratem* illum *Coum* quod attinet, cujus etiam natalem, ut apud se geniti Dei, diem, quotannis cives sui celebrarunt, in illo viro omnia sunt stupenda; quasi non præcepta, sed Oracula totidem, posteritati tradiderit. Neque tamen iste sibi solus omnem ita penitus vindicavit gloriam, ut non adspirare ad summum in Re Medica decus, *Pergami* genitus, ausus fuerit *Galenus*; cujus viri labores, sane haud pauci, iique omni eruditionis genere conditi, omnium ficuti manibus teruntur, ita & applausum merentur.

Quis ipsius Naturæ interpretem non veneratur *Aristotelem*? cujus capax ingenium *Alexander* ille *Magnus* & animo est admiratus, & liberalitate plurimum fovit. Quis *Theophrasti* audit nomen? ut non divinum sibi fingat os, & nectare dulciorem orationem. Hunc, *delicias suas*, & , ex familiari lectione, *amicum* appellare con-

fuertis fuit ille *Romani* Eloquii parens *Tallius*. Huic, quum *Tyrtamus* antea vocaretur, *Euphrasto* nomen imposuit magister *Aristoteles*, & ipsum a singulari eloquii vi deductum vocabulum. Evicit tamen postea orationis excellentia, ut potius *Theophrastus* diceretur.

Tantum virorum virtus & fama haud tamen absterruit *Anazarbeum Dioscoridem*; Qui, elaboratis *Hyles Iatricæ* libris quinque accuratissimis, amplissimum ab ipso *Galeno* retulit testimonium.

Gloriam, atque omnem Nominis Famam, ut rem vanam, nimis quandoque superciliosi, contemnunt Philosophi; quos tamen pulchre *Cicero*, ad aucupandam regloriam, quam verbis contemnunt, iisdem illis, quibus eandem damnant libris, Nomen suum ait inscribere. Et quidni ex ingenii sui foetu Famam sibi apud posteros quærerent illi? qui etiam, ut Nomen suum ad Sectatores transiret,

omni ope sunt anaxi, omnemque ingenii vim consumere, ut sua potissimum prævaleret sententia.

Jam & illos, qui dicendi plurimum virtute valuerunt, quique rerum gestarum condidere Annales, quem acriorem existimatis habuisse stimulum, quodve amplius proemium, quam æmulationem atque gloriam? Non ita adversarii evitare ictus, & apertum mucroni locum quærere, gladiatoria unquam potuit exercitatio, quam par illud, quod in *Græcia* *Fortuna* comparaverat, *Demosthenes* atque *Æschynes*; quorum ille quidem, audito semel, qui tum magna cum populi admiratione causas agebat, Oratore *Callistrato*, unice ad Eloquentiæ studium accensus, emendata etiam per impigrum laborem naturali balbutie, ad tantam pervenit famam, ut etiamnum commemorato ejus nomine, maximæ eloquentiæ consummatio animo oboriatur audientis. Hic autem, quum
præ

pra indignatione amissa victoria, iubens
Athens valedixisset, in ipsa calamitate sua
 maximum adversario dedit testimonium.
 Hunc enim, quem *summan* appellat *Orato-*
rem, narrat *Plinius*, praelegisse *Rhodiis*, illam
 quae adhuc exstat, Orationem in *Ctesiphon-*
tem, & simul praeclaram illam *Demosthenis*
Defensionem, mirantibusque, tum magis
 fuisse miraturos, respondisse, si ipsam illum
Demosthenem orantem audivissent. Adeo ille,
 qui plurimum dicendo post *Demosthenem*
 valebat, *Alcrynex*, primus *Rhodi* atque
Sami esse & haberi maluit, quam ipsis
Athens secundus.

Claudent agmen, Historiarum laude no-
 bilissimi, *Herodotus* atque *Thucydides*. Quo-
 rum ille, provide prospiciens altum audi-
 toris sui animum, patrem *Orohum* ultro esse
 adhortatus, ne educationem ejusmodi ne-
 gligeret filii, quem sibi in magnitudine
 gloriae facile successurum vaticinabatur.
 Hic autem, generosa indolis adolescens,

H

VIX

vix sexdecim annos natus, ubi in Olympiis *Musas* suas recitantem Patrem Historiæ audit *Herodotum*, nec lacrymas præ admiratione, atque idem olim faciendi cupiditate, tenuisse, affirmatur. Unde & postea cives sui, quem propter amissam *Amphipolim* exilio damnarant, Rerum Conditorem revocavere, eloquentiam ejus mirati, cujus virtutem damnaverant.

At vero, tanta hæc, & tot ingenia, ubi & quando nata sunt? In *Græcia*, certe, sed libera, sed nullo Tyranni jugo pressa, nullius victoris, libidini prostituta. Libertas, fari quæ sentias, in commodum & publicum & privatum, nullos vel auricularios vel delatores metuentem, permittit. Libertas eadem generosos producit animos, & æmulationem inter pares, maxime accendit. Itaque, pro virili *Macedonum* Tyrannidi obistentes, *Athenienses* exemplo suo firmavere & *Demosthenes* & *Hyperides*. Neque enim *Philippus*
astu-

astutia sua, Ducem sese *Græcia*, non Regem, appellans, deturbare eosdem a tuenda Libertate potuit; neque *Alexander*, domita *Asia*, felicitate sua ad se pertrahere; neque *Antipater*, corporibus potitus, animum, quantumvis violentus, expugnare. Alter enim ultro medicata sese potione absolvit; alter, ne Patriæ res proderet, præmorsa etiam lingua, sibi ipsi, vel in crudelissima morte, silentium indixit.

Quousque itaque virtus *Græcorum* hostibus fuit formidabilis, eousque felicitum ingeniorum ferax eorundem tellus fuit; imo quamdiu sapientum atque doctorum virorum ingens numerus, mutua æmulatione, nihil esse utile, nisi quod & simul esset honestum, & scriptis & factis ostendit, non potuit non felix *Græcia* esse status, & tuta libertas. At ubi sua virtuti subducta sunt præmia, & ineptum existimavere laudari a continentia, frugalita-

re; fortunadine, qui laudanda facere desierant; ingenia quoque ipsa degeneraverunt, & ad assenationem composita, dummodo grata Imperantium auribus proferrent, nihil pensi habuerunt, venalem & linguam & fidem, non veritati, sed comodo suo addicere.

Apparet itaque A. H. vicissitudinem illam, quæ in cunctis fragilitatis hujus humane dominatur rebus, terminum etiam gloriæ *Græcorum* posuisse, & cessante emulatione, victores quondam domitoresque Gentium, mortalium sapientissimos, & Fortunæ muneribus beatissimos, redactos eo, ut sub alieno semper arbitrio viventes, oblitterata quasi pristina virtute, infelicissimi evaserint mortaliū.

Et tamen hodieque fama istius Nominis totum implevit Orbem, & *Græcorum* Literarum cultus inter maxima Humanioris Literaturæ ornamenta recensetur. Re-

cite

Et sane. Nam sicut adhucdum in Scriptis suis vivunt, quorum tellus nil nisi mortales habet exuvias; sicut adhucdum delectant animos, qui quondam lyræ & carminis sui suavitate doctas ad sese aures rapuere; sicut adhucdum regnant in Orationibus, qui plena olim moderabantur theatra; & denique, facienda fugiendaque, sub exemplis rerum olim gestarum adhucdum demonstrant, qui civibus quondam suis, vel sua, vel sui similibus virtutis exempla, illibata fide tradiderunt; ita iidem, & nunc, & semper virtutis æmulationem, & Gloriæ cupiditatem, in omnibus illis accendent, qui nobiliore ingenio præditi, non solis sibi, sed patriæ quoque communi, sese genitos reputant; nec famam nominis sui, ex mortalis hujus corpusculi duratione, sed superstitere quoque fama, meriuntur.

Quare, quum verissime, de *Græcorum* Lingua atque Monumentis, ad illos, qui

I

hæc

hæc talia & tanta contemnunt, dici queat id, quod respondisse olim spreto *Gracis* referunt *Gelonem*, *Siciliæ* Tyrannum: *Ver illis ex anno exemptum esse*; quis rectus rerum æstimator, non abundare virtutibus Patriam nostram fatebitur, dum & ipsa alienas amat? Quid enim pulchrius, quam liberos homines, nec bellica virtute destitutos, artibus certe & inventis claros, delectari & Lingua & Monumentis illorum, quibuscum illis tanta virtutis & fortunæ cognatio intercedit? Quid præstantius, quam similibus sibi virtute excitari, & commemoratione, atque lectione rerum ab iisdem magnifice gestarum, ad æmulationem virtutis accendi, & ad veræ gloriæ viam festinato cursu contendere? Ut tandem desinant obrectatores laudum heroicarum, *Græcorum* Annalibus fidem derogare, quum, in literata Gente, & pertinacissimo libertatis suæ defensore, paria virtutis admirentur exempla.

Bene

Bene, quod apud *Batavos*, expulsa lare suo *Vetus Græcia*, non tam tutum Exilium atque honoratum, quam ipsam invenerit Patriam. Certe ad hanc Urbem, & Illustre hoc Gymnasium, tanquam in sanctissimum sese contulit Asylum, seseque totam insinuans immortalium virorum pectoribus, velut ipsius natalis soli oblita, Bicipitem suum transtulisse *Parnassum*, & *Heliconiadum Musarum* fixisse domicilium videtur.

Quum enim altius animo meo vetera hujus Urbis atque Academiae Decora revolve, Imagines & Monumenta, mori nescia, sese ingerunt, longe maximorum Virorum, qui utramque, domicilio suo, lingua, scriptis reddidere illustrissimam. Vera Nobilitas, quæ ex virtute procedit, quos habebit unquam Literarum gloriâ famâque Virtutis, *Scaligeris*, *Clusis*, *Salmasiis*, æquiparandos, nedum præferendos? Portenta hæc ingeniorum, la-

borum, laudum, honoratum larem in hac habuerunt Urbe, & præsentia sua, velut Studiorum quædam Numina, fovere non tantum, sed & afflare nobiliora visa sunt ingenia. Itaque Ædes illorum Tempa, Pectora Adyta fuere, Scripta adhucdum instar sunt Oraculorum.

Nolite expectare A. H. per singula meritum hujus Lycei Ornamenta, quorum sane quantumvis parca laudatio etiam libri molem facile implere posset; sed tamen finite vestra parumper abuti patientia, illos ut recenseam, qui *Grajas Musas* in *Batavorum* adduxere Terras, & *Græcæ* Sapientiæ thesauros Patribus nostris recluserunt.

Quum nobiliter libertatem Patriæ, ferro & fame pressa Civitas, heroica vindicasset constantia, accepta Sapientiæ & Literarum Tutela, *Argolicas* primum *Musas*, sub *Petrejo Tiara* salutavit. *Apollinis* hic filius, non Medendi tantum arte
(quæ,

(quæ, nescio, quo fato, maximòs, olim quidem, in Literis etiam Humanioribus, Orbi viros dedit) sed & Poësi clarus, felicissime veteres *Græciæ Vates Latino* expressit carmine.

Major *Bonaventuræ Vulcanii* fama, quo quidem viro, nescio, an solide magis doctum, & in *Græcis* Scriptoribus, cui sese unice studio addixerat, exercitatio-rem, ferax ingeniorum, tellus nostra, sinu suo foverit. Hic, quum ad decrepitam usque ætatem, indefesso labore, ducem sese studiosæ præbuisset juventuti, post mortem etiam exemplum magnificæ liberalitatis exstare voluit; nascenti enim Bibliothecæ, librorum suorum thesauros, maximum plerumque Literatis patrimonium, æmulandâ beatoribus legavit munificentiam.

Æternitatem cogitare symbolo suo jussit *Joannes Meursius*; æternitatem ipse, si quis unquam, improbo labore est affecu-

K

tus.

borum, laudum, honoratum larem in hac habuerunt Urbe, & præsentia sua, velut Studiorum quædam Numina, fovere non tantum, sed & afflare nobiliora visa sunt ingenia. Itaque Ædes illorum Tempia, Pectora Adyta fuere, Scripta adhucdum instar sunt Oraculorum.

Nolite expectare A. H. per singula meritum hujus Lycei Ornamenta, quorum sane quantumvis parca laudatio etiam libri molem facile implere posset; sed tamen finite vestra parumper abuti patientia, illos ut recenseam, qui *Græjas Musas* in *Batavorum* adduxere Terras, & *Græcæ* Sapientiæ thesauros Patribus nostris recluserunt.

Quum nobiliter libertatem Patriæ, ferro & fame pressa Civitas, heroica vindicasset constantia, accepta Sapientiæ & Literarum Tutela, *Argolicas* primum *Musas*, sub *Petrejo Tiara* salutavit. *Apollinis* hic filius, non Medendi tantum arte
(quæ,

(quæ, nescio, quo fato, maximos, olim quidem, in Literis etiam Humanioribus, Orbi viros dedit) sed & Poësi clarus, felicissime veteres *Græcia Vates Latino* expressit carmine.

Major *Bonaventuræ Vulcanii* fama, quo quidem viro, nescio, an solide magis doctum, & in *Græcis* Scriptoribus, cui sese unice studio addixerat, exercitiorum, ferax ingeniorum, tellus nostra, sinu suo foverit. Hic, quum ad decrepitam usque ætatem, indefesso labore, ducem sese studiosæ præbuisset juventuti, post mortem etiam exemplum magnificæ liberalitatis exstare voluit; nascenti enim Bibliothecæ, librorum suorum thesauros, maximum plerumque Literatis patrimonium, æmulandâ beatioribus legavit munificentiam.

Æternitatem cogitare symbolo suo iussit *Joannes Meursius*; æternitatem ipse, si quis unquam, improbo labore est assecu-

K

tus.

tus. Nemo, ut opinor, injuriam me cuiquam fecisse æstimabit; si, huic uni, præ omnibus aliis, plurimum debere Veterem *Graciam* dixerim. Nulli sua ita nota domus, quam *Meursio* fuere *Athenæ*, *Attica*, & omnis *Græcia*. Nemo suos melius novit mores, quam ille *Græcarum* Urbium & Populorum.

Nunc; corculum illud *Musarum*, Illustrium *Dauzæ* & *Scaligeri* delicias, quo potissimum nomine commendabo, *Danielem Heinsium*? præcox ingenium, summa æmulatio, festinati honores, *Danielem* commendant *Heinsium*, sed super omnia beat, Elegantioris Literaturæ, atque Principum Virorum amor & deliciæ, *Nicolaus Heinsiades*, & superstes etiamnum, Felix Propago, atque Amplissima Affinitas.

Cui quam bene jungitur Nobilis Collega, Decus olim Literarum, Eloquentiæ Suada, *Josepbicæ* (si per Fata licuisset.)

Hi-

Historiæ assertor, *Petrus Cuneus*. At, non extincti penitus (vetat enim Fama) Gloriosa Nepotum Virtus, vivam adhuc exhibet Imaginem; qui, sicut ille olim huius semper florentis Academiæ, ita (sub quorum illa Ægide tuta degit) & Urbis & Patriæ etiamnum summa sunt Decora.

Frustra *Plutarchum* suum, aliorumque multiplices doctrinæ foetus *Græcia* nobis objicit. Habuit hæc Civitas, unum parem omnibus, *Gerardum Joannem Vossium*. Noverit virum, qui, Bibliothecam spirantem, & omnium Scientiarum locupletissimum dixerit Thesaurum.

Barlaeos, Perizonios, Gronovios, Doctrina, profundissimæ eruditionis radios ex pulcherrimis illorum spargens Monumentis, ubique terrarum clara facit nomina. Ex quibus, inprimis, magni illius *Ioannis Frederici Gronovii*, dignissima soboles, *Iacobus*, innumeris sibi *Græciam* devinxit officiis. Testes *Polybius, Arrianus, Hera-*

aditus, qui & juvenem exercuere, & senem hilari labore sunt experti. Hoc ego studiorum meorum Duce, & laborum Hortatore superbio.

Hujus *Atlantis* me subire vices, ILLUSTRISSIMI, NOBILISSIMI, SPLENDIDISSIMI DOMINI CURATORES, ET AMPLISSIMI ATQUE GRAVISSIMI FELICISSIMÆ URBIS PROCERES, dum BENIGNISSIMA VESTRA jussit MUNIFICENTIA, sentio sane, quantum onus humeris meis exceperim. Verumtamen, quoniam jacta est alea, & tantum ad me Decus, sine ulla præhensione, improvisum, inexpectatum, a GENEROSISSIMA VESTRA LIBERALITATE ultro est provolutum; summis annitar viribus, ut AMPLISSIMO JUDICIO VESTRO, *Spartam*, quam suscepi exornandam, porro amplificare videar. Imo ultro profiteor, tanto acrioribus me incitari stimulis, quanto majora æmulationis exempla, quibus hoc ipso succedo tempore,

pore, omnibus in propatulo sunt propo-
sita.

Ad Vos nunc accedo, Celeberrimi at-
que Eruditissimi Bonarum Artium atque
Literarum Professores, qui ita Clarissima
hujus Academiae estis Lumina, ut simul
luceatis universo Doctrinarum Orbi. Re-
cipite me in Nobilissimum Vestrum Col-
legium, qui tamen, quum me ipse in-
tueor, facile meam agnosco mediocrita-
tem. Nullas ego Majorum ad Vos ap-
porto Imagines, apud quorum plurimos
perpetuata simul cum summa eruditione
Paterna sunt Decora. Adfero tamen il-
lum animum, qui mirabitur in Vobis pri-
sca illa celebratissimi hujus Lycæi Orna-
menta; Non ego veteres illos Heroas,
nisi nomine & corpore tenus defecisse
arbitrabor; ubi, in præclarissimis ingenii
vestri dotibus, Divinae omnis Humanæ-
que Sapientiæ cognitionem laudabo. Imo
cum iis ipsis intima mihi videbor familia-

L

ritate

ritate conjunctus; ubi, adscitus in Honorificum Vestrum Consortium, Vestra Societate, Vestro Convictu, mutuisque invicem Officiis uti atque frui licebit.

Supereſt Orationi meæ Nobiliſſimorum atque Ornatiffimorum Juvenum Studioſa Cohors, Spes Parentum, Spes Patriæ, Spes Eccleſiæ; ad hæc & majora olim adſcenuſura Decora, modo adſit animus impiger, ſtudioſum indefeſſum, æmulatio mutua. Degeneres animos fatiſcentis ſæculi rapiunt vitia, & falſa ſub peregrino nomine Eruditio. In hoc incumbite, ne juvenes vos, prudentiâ ſenes, indiſtriâ æquales antecendant. Agite, cum ſtrenuis virtute, cum modeſtis pudore, cum innocentibus abſtinentiâ, cum doctis eruditione contendite; de gloria & honoribus ſecuri; ultro vos ſequentur.

Utinam Sapientia oculis cerni poſſet! Incredibilem, ſcio, in animis intuentium ardorem excitaret. Nunc variis Diſciplinis

nis (ut variegato olim Peplo suo *Minerva* illa *Atheniensis*) involuta; non aliis sese conspiciendam exhibet, quam quos beatorum numero diffidens plebi sua virtus eximit, & pares facit illis Heroibus, quos olim ipsius Deæ Peplo, Gloriæ & Sapientiæ Theatrum *Athenæ*, inferendos censuerunt.

Sane sibi ipsi Virtus maxima est merces, & constanter animo suo vir probus tenere debet, etiamsi nulla præclaris actis relictæ esset remuneratio, sese tamen, quod suum est, agere, dum immortalem animum iis subducit erroribus, quibus mortale corpus affligitur, illumque ipsum admovet considerandis mirabilibus Dei Operibus, & excolendæ conditioni, qua super omnes reliquas humana excellit natura.

Nunc & sua etiam Virtuti præmia Providum proposuit Numen, &, Gentilium licet, magnorum tamen virorum, exem-

pla atque monumenta, immortalibus
Græcorum scriptis, ad nos perlabi sive;
ut vel inde petamus, quos civili in vita
admiremur, imo quos longissimo post
nos relinquamus intervallo, non ab Hu-
mana Sapientia, sed Deo Doctore erudi-
ti, neque ancipitem apud homines Fa-
mam, sed veram apud Deum Gloriam,
& Vitam consecuturi Immortalem.

D I X I.

